

Penumpang dari China diasingkan

Ketibaan pesawat, kapal laut dialih elak percampuran

Oleh Mohd Nasaruddin Parzi
bhnews@bh.com.my

Kuala Lumpur: Malaysia terus memperketatkan kemasukan pesawat dan kapal laut dari China di lapangan terbang serta pelabuhan dalam usaha mengekang penularan coronavirus ke negara ini.

Menteri Kesihatan, Datuk Seri Dr Dzulkefly Ahmad, berkata Pejabat Kesihatan lapangan terbang dengan kerjasama Malaysia Airports Berhad dan Pihak Berkuasa Penerbangan Malaysia (CAAM) akan mengalihkan ketibaan semua pesawat dari China ke pintu khas bagi mengelakkan percampuran antara penumpang dari destinasi China dengan penumpang dari destinasi lain.

Beliau berkata, di pelabuhan pula semua kapal dari China akan dikuarantin sehingga kakitangan Kementerian Kesihatan selesai menjalankan pemeriksaan.

"Aktiviti pemunggahan barang dan penurunan anak kapal serta penumpang hanya akan dibenarkan sekiranya pemeriksaan mendapati semua penumpang dan anak kapal sihat serta dokumen kebersihan kapal disahkan," katanya dalam satu kenyataan semalam.

Menjelaskan pemeriksaan penumpang pesawat dari China, Dr Dzulkefly berkata, saringan demam menggunakan pengimbas suhu akan dilakukan di pintu ma-



Malaysia akan memperketat kawalan terhadap kehadiran pelancong dari China di pintu masuk utama negara dengan melaksanakan beberapa langkah khas bagi mengekang penularan coronavirus. (Foto BERNAMA)

salu lapangan terbang.

"Mereka yang disyaki PUI (Pengesanan Kes Yang Disyaki) akan terus dirujuk ke hospital melalui laluan khas yang dikenal pasti bagi mengelakkan pendedahan kepada penumpang lain," katanya.

Syarikat penerbangan juga katanya, sudah diminta mengenal pasti penumpang mempunyai gejala virus itu semasa dalam pesawat.

"Jika ada, anggota kesihatan di pintu masuk antarabangsa (PMA) akan menunggu ketibaan pesawat di pintu tertentu.

"Apabila kapal terbang tiba di pintu dikenal pasti, pasukan ke-

sihatan akan menaiki pesawat untuk mengendalikan kes berkenaan. Pengendalian penumpang lain adalah mengikut prosedur sedia ada," katanya.

Beliau berkata, di PMA, semua pengembara yang tiba dari China akan disaring bagi menentukan sama ada mereka mempunyai sebarang gejala seperti demam dan batuk.

Selain lapangan terbang dan pelabuhan, katanya saringan juga membabitkan PMA darat, menjadikan jumlah keseluruhan 64 PMA yang disaring di seluruh negara.

"Ketika ini terdapat 54 pengimbas suhu di beberapa pintu masuk

utama negara. Mana-mana pengembara dikesan demam akan diperiksa oleh paramedik untuk mengesahkan demam. Sejarah perjalanan ke China dalam tempoh dua minggu sebelum tiba di Malaysia akan diperolehi.

"Bagi pengembara tidak memenuhi kriteria PUI akan diberi Penilaian Kesihatan Kendiri (*Home Assessment Tool*) dan diletakkan di bawah pengawasan rumah untuk tempoh 14 hari," katanya.

Kakitangan Kementerian juga akan menjalankan pemeriksaan rawak dari semasa ke semasa ke atas rakyat tempatan yang menggunakan pintu automatik lapangan terbang.

"Kami juga berharap mereka secara sukarela tampil untuk pemeriksaan kesihatan di PMA," katanya.

Sehingga semalam, coronavirus baharu atau 2019-nCoV sudah mencatatkan 106 kematian, semua di China dengan jumlah mereka yang dijangkiti 4,515 orang berbanding 81 kematian dengan 2,835 orang dijangkiti Jumaat lalu.

Semalam, Jerman dan Sri Lanka menjadi dua negara baharu yang melaporkan mangsa virus berkenaan, Thailand merekod enam lagi mangsa baru, menjadikan semua 14 kes di negara itu iaitu tertinggi di luar China.